



S. O. P. LEH KOCHUAM TE

Standard Operating Procedure (SOP) hi Covid-19 hivi apat i zil daw thak uh paumal ahi. I gam sorkal chun Biakin hawn thei na ding dan SOP dungzui ah kikhawp phalna ei piau ah, zia chu i biakin in dawl zat kimkhat, chuleh kikhawm ten Social distance leh mask mat zawm zel ding, hand sanitizer tawh bit tak ah hun mat ding ti a hi. Kochuam ten le Biakin i hong sau sau tau ah hun sawt-tak mai Pathian pakna la sakhawm talo ten i sakhawm ua, Pathian thu i ngaithak kit ua hin kipakna sangtak i nei chiat ding uh kinep a um khawp mai hi.

Covid zaw khawvel (post-covid) ah Lalpa pawlna thak i chan thei na ding un Thagau lam SOP le i zui khawp ngal uh ngai ding dan a hi. **Social distance** hi covid galdona matchak pha pen laka pakhat a hia, zia chun khawvel mi dang te tawh ei ki gamlat saka, insung mite tawh ei kinai sak hi. Zia gual ma chun, i thagau damna ding in khawvel gamlat ah Pathian i nai zel a pawimaw hi. **Face mask** hile covid lak apat kivenna matchak hawi pen ah i la nei lak ua pakhat a hia, zia hin buaruak ah hipi leng vel a patin ei bitsak uh a hi kha. Chuleh, Covid zaw khawvel (post-covid) a hin le hitang leh natna tamtak daltu ah mat thei nalai ahi. Pathian mite â dinga chun muk tuam hi damdawi hawitak a hi dan Bible in ei gen bawh hi. “...Phatna a mu thei na ding ah hinna dawwi ah damsawt ngaina mi chu kua a hem, la lei chu gitlona laka pat vengpha la, la muk chule thepna thu genlo dingin huktup in” (Sam 34:12-13) ti a hi kha. **Hand Sanitizer** hi covid hipi beplo lungme damdawi leh thil dang dang ah le a phat dan i la he tau a hi kha. Tuhin, nisin hunsin ah Lalpa â dinga pawmtak kithawina hing leh thiangtho dinga i taksau chu i lat zel thei na ding un Kalvary tuihing hi Pathian chate sanitizer hawi pen a hi zel ding a hi.



KOCHUAM HUANG

Biak In kihawng sau sau ta

Pathian in i pauchapna teu ei dawnhu ah, hun sawtpi kikhawm thei talo te haw le tuhin Biak In a kihawng sau sau ta, khawpi sung lam ziang le a ki hawng suak ta hi ah hiat ahia, kipak a um ma ma hi. A hinla, Sorkal siam SOP zui ah kikhawp ding ti a hi ziak in kochuam ten zui ham ham chiat ding in i ki neppi a hi.

Joint Presbytery Meeting nei a hi

September 29, 2021 ni khan Thangkai Lungpau hall ah Joint Presbytery Committee meeting nei a hia, member 52 lak ah 40 chiakhawm in vaihawmna kitup leh dawi um tak ah matzaw a hi. Zia hun a hin Manipur Area leh Synod lama tutto ding thu tak tak lel a hi.

Trust Committee malakna

Trust Committee member te chun i kochuam thilneite suktup na ding in pan nasa takin a lau a, October 1 & 2 sung

a khan Kangvai Kochuam Biak In Compound ah Mizoram Synod in ei la lawplut nau suangphu cheimawi ding dan te, Torbung ah gam kichaw etkawl ding dan te, Chiangpi mun ah Pu Thangkai & Pu Lungpau statue chei phat ding dan te leh D. Khawzim Pastor Quarters siamphat ding dan te a mun chiat in a va enchian ui. Gapha a hung sua ngei kinep a um hi.

Pathian Biak Kikhawp Puihuaina Bu Revised & Enlarge thu

Synod Executive Committee in ei phalpiak tawh kitawn in tu i mat lai uh Pathian Biak Kikhawp Puihuaina Bu hi revised & Enlarge bawl ding Committee siam a hia, October 5, 2021 a khan meeting masa pen a chuu a, gun tak ah muangchang deu ah bawl ding in guanggalna a siam ui.

Presbytery Kikhawmpi 2021 matzaw hi ta

Manipur Area nuai ah Presbytery pathum chun October 7-10, 2021 sung a khan kikhawmpi dawium takin a mangzo chiat hi ah hiat

Hingna Vâk

a hi. Tanggam Presbytery chun Mualdak kochuam ah mangin Kochuam Upa 3 a namdet ua, Kochuam Upa 1 puanlatna a nei bawk ui. Phaipi Presbytery chun L. Munlai Kochuam ah mang in Kochuam Upa 10 a namdet ua, Upa 4 puanlatna a nei bawk ui. Lamka North Presbytery chun Sokom Kochuam Biak In ah mang in Kochuam Upa 6 a namdet ua, Kochuam Upa 4 puanlat a hi. Lamka South Presbytery chun Gangpimual Kochuam ah mangin Kochuam Upa 5 a namdet ua, Kochuam Upa 2 puanlatna nei bawk ui. Chuleh, Pro. Pastor dawn mi 3 Synod ah a dawtpi ui. Rev. R. Lalhmingsang Administrative Secretary chun Phaipi Presbytery a va matpi a, Rev. S. Lama Vaiphei Co-Ordinator in Lamka North Presbytery a va matpi hi.

Manipur Area Committee

57-na

October 15, 2021 ni khan Ngopa Presbyterian Kochuam Biak In ah Manipur Area Committee nei a hi. Zia hun a hin Manipur lam apat in

member paguk (6) a ki chiakim thei a, Mizoram apat in Synod Officer pali (4) a hung pang thei ua, vaihawmna kitup taka mat a hi. Ngopa Pastor leh Upate chuleh kochuam ten nasa takin ei la ngaisak ua lim tak ah hun mat a hi.

Text Book Cell Committee malakna

October 19, 2021 akhan Text Book Cell Committee chukhawm in lekhabu print ding mabak tampi i nei teu endiktu ding a guanggal ua, Tukum ah mat ngal ding te, kumkit ah mat ding leh kum kit zel ah mat ding tiang le guanggalna siam in ma a lau hi.

Vaiphei Holy Bible Reprint

Manipur Area Committee in ei phalpiak na dungzui un Vaiphei Holy Bible copy 5000 reprint a hia, October 21 a khan Dimapur Auxiliary a pat puak tung a hi tai. Office Staff ten gim leh chawl khawk saloin ei kawi tup piak ua lungdam a um ma ma hi. November 02, 2021 zingkal lam 11:00 A.M. leh Office Compound sung a hin Rev. Dr. Yiepetso

Wezah, Dimapur Auxiliary Secretary in release ei bawl piak in BSI campaign ei neipi ngal ding ah ngai a hi. Zia hun a hin Manipur Area Choir apat Pathian chawihawina La ngaithakna le um ngal in a. I Bible man ding chu zia gual hi hin a:

Ordinary (PL)	₹ 350
Special (Yapp)	₹ 700
Special with Zipper (Zip)	₹ 800

Staff Retreat

October 23, 2021 ni khan Manipur Area Office Staff te chun Administrative Secretary mapuina in Kakching Garden

leh Langol Peak taw kawmin retreat a mang ui. Zia hun a hin **“Nangma la kihepi gual in la vengte le la hepi ding a hi”** (Marka 12:31) thupi ah mat a hi. Pathian puihuaina tawh lim takin hun a mang zo ua, zawngsak ma ma uh hi ah hiat a hi.

Revival Speaker Dingte

Kum 2022 sung ah Manipur Area Revival Speaker ding, Revival Committee in a nei ah, ziana ah chun a nuai ah te hi lâk a hiu:

1. Pu V.K. Thanga
2. Pu Kamzathang
3. Tv. ST. Satbawi
4. Tv. M. Sasang

HIATTHIAM DAWTNA

October 2021 tha bul lim ah kipat khan Manipur Area Committee leh Committee dang dang a um ah, chuleh, Programme chi chuam chuamte i nei zia in **Hinna Vak Editorial Board** lam te hi a hun leh phat ah kichan manlo ka hi phawt mai ua, la ngaidamna' u ka hung dawn ui.

-Editor

La Lampiteu Chu Suinawn Kit Un

Pastor Nicky Lalremmawia

i/c New Lamka Pastor Bial

Bible in lampi a ti hi Pathian lam nga ah mihingte hindan a genna a hi sek ah. Sam ziktu chun ‘Lampi pha bukim’ (Sam 101:2) a ti te hi Pathian biak dan dik a genna a hi. Sam 119:1 ah dem kailo a ti hi le Pathian mi diktak a genna a hi. Chun, Lal Jesu’n ‘kei hi lampi leh thutak’ a ti khan ama chu Pathian kiang tun theina a hi zia a genna a hi. I Bible chang tel ua pat “La lampi teu chu seinawn kit un” a ti hi le lam dik, Lal Jesu i zawt ua, ama’n lampi ei kawkmun ngei chu i zuina ding ua ei kona a hi.

I changtêl u leh i thupi ua pat kichian tak ah mu thei chu ‘Lampi neu’ ti laitak a hi. Zia apat hung kilang ngal chu lampi pakhat sang ah tamzaw a um hi tina a hi. Zia ziak a chun, i chiana diu lampi tel pilvang a kul ma ma hi. Chun, zia lampi i chianau ah chun thîl ding diktak i thîl uh a pawimaw ma ma hi.

Bang lampi a hi em i zawt diu chuh?

1. Kawtkhak neu leh chip a hi:

Lal Jesu’n zia lampi chu haw ding ah ei ziltîl dan hi kawng chuam chuam in i mu’u ah. Matt 7:13 “Kawtkhak neu ah chun lut un. Manthaina lam

zawtna kawt chu a lian in, a lampi le a nuam in, zia lam ah chia chu tam le a tam u’i. Hinna lutna kawtkhak chu a chîp in, a lampi le a haksa’n, a mu te le tawmcha a hui.”

a) Haw thatnawp um lo tak gual in a kilang. Lampi neu leh chîp, phawl lek-luk a hi tuak ngei hi.

b) Pathian sang ah sum-le-pai ngâina zaw te a kithawl puau. “Mi hausa Pathian gam a lut sang in sangawngsau pin bil hawm ah a lutthen a bailam zawi.” (Matt. 19:24)

c) Lam dik haw ta sa ten le a petmang san thei sek u’i. “Chuleh, hampa ling nei lak ah ketha te chu, zia te hi a hui:

Thu chu a hia'u ah, himaleh khawvel ngainatna te, hausak nawpna te, thepna te leh thil dang dang ah nawpna te a hung lut phat leh, ga sua zolo in a um ta sek u'i." (Mark. 4:18-19)

d) Lam dik zawk chu thatnawp umlo tak gual in kilang maleh têt ding in ei dawi a hi.

Lal Jesu chanchin hi zia khawvel ahin i gentheipi chang um sek maleh, a hi dan tak ah chun i lawkpinaw a tam zaw ma ma hi.. Ei siamtu leh i phatna ding ua bangkim ei sep piak sek tu i Pathian uh thu gual ah um mai hi lei ah leh, van tiang ah le ei uh â ding ah pha pen ding a hi ti hi ging ngam hitiu.

2. Lam zang a hi :

a) Baptistu Johan chun zia lampi a guanggal ding dan a genna ah chun "Lalpa lampi sial unla, a lampite chi hi'zang un." ti in zia lampi thu chu a hung tangkopi a hi.

b) "La keng teu â ding in lam zang kisiam un," (Heb. 12:13) a ti khan zia lampi zang chu petsan lo ding ah a zilti a hi.

c) "Mi chiahialte thilbawl ka

hua hen, amau tawh bangma bawl khawm puang kau" (Sam101:3) a tia. Pathian in a lampi apat petmang leh vakmang te chu a hua a hi ti a genna a hi.

Khawvel hin zia lampi zang i haw lai apat ei puimang gua in, sum leh pai te, nungak-tangvalnate, khamthei thil te leh khawvel pak hawi chi chuam-chuam in ei la them sek ah. Zia gual chu a hi zia in i lampi teu i suinawn kit uh a ngai hi ti hi Pathian thu chun ei la hil a hi.

3. Lampi chu petsan thei a hi:

Bible ahin lam dik haw ta ngal ah petmang san kit ta chanchin tamtak i mu'u ah. Neukhat taklang hitiu.

a) Solomon chu pilna petu Pathian apat petmang in, Pathian sang ah khawvel lopina leh hawina a têt zia in siatna huaisia tak a tuak hi.

b) Khawsak mipil te khan le Pathian puina thil lo ah amau dawi dan bep thil ah a chia zia in a lampi hawnau apat in

Hinna Vâk

a gam mang khawlaw ua, Leng Herod lal In a zuan u'i.

c) Galatia gam ah Khristiante chun ziltina diklo a la pawm ua; Pathian thu tak khel ah thudang gen leh thatnawpna lam zuan ah, a la del ziak un a gam uh a chautha ziang ah. Ziagual ah nawpna leh limna bep del te chun Pathian lampi chu a mansua sek uh a hi.

4. Et ding dik tak et a pawimaw hi :

Lal Jesu'n "Keima hi Lampi, Thutak leh Hinna ka hi. Keima ah chia lo chu kuama Pa kiang a tung ngai puau hi" a tia. (John. 14:6) Thil ding, et ding dik tak - Lal Jesu et lo chu a khawk ma ma ziang hi. Sawtlo cha hilehle thil khawk tak a tung man thei hi.

I nisin hinkhua'u ah bang lampi haw i hiu em ti hi i kisui a pawimaw ma ma ah. I lam haw diu hi têt pilvang a ngai hi. I thupi'u apat i hiat thei chu

Lal Jesu'n lam i têt ding uh ei kawkmua ah. Zia lampi chu haksa ma ma leh le têt tei tei ding in ei dawi a hi. Pathian dawi lampi dik haw ding chun i kisui ngun uh a pawimaw hi. Petsan thei a hi ziak in nisin i hinkhua'u ah leh i lam zawtnau ahin thil ding diktak Lal Jesu hi thil zing leuhin chiakhial ngailo ding i hiu.

I thupi'u mangcha'n mani nun, sungkuan leh khawtang nun kisui thak kit ding in Lalpa'n ei dawi a hi. I thagau nun uh, mu theilo lam bep hilo in, taksa lam ah le i kisui zui zing uh a pawimaw hi. Lam diklo i haw ziak ah lungthim, taksa leh thagau ah i thawklo

Zia lampi chu haksa ma ma leh le têt tei tei ding in ei dawi a hi.

Pathian dawi lampi dik haw ding chun i kisui ngun uh a pawimaw hi.

Petsan thei a hi ziak in...

ding uh i thuak sek un a kilang hi. Bawl lo ding i bawl ziak ua i mimal nun leh sungkuan nun hung kêkzâk sek te hi gun tak in sui hitiu in, Lalpa'n ei thumawp "La Lampi teu chu suinawn kit un" ti hi ngaitua zel sek hitiu.

Thina Khêl ah

~ Upa D. Siaklam

Moderator, Phaipi Presbytery

Tulai hun umdan te hi la het ziakun, ipmu lai thawhal a hun takzet tai ti hia'i tiu." Zia thu hi Bible in ei gen a hi. Rome 13:11

Khawvel ah thiltungte hi i ngaitua a hi leh, Lalpa Jesu khawvel ah a lênlai ah hun nunung ah thil hung tung ding a gente a hung tung zung zung in a kilang ta. Tuhin le i gamsung leh khawvel pumpi'n a buaipî natna hî phalo COVID-19 hipi leng in mi tam tak in thina tuak in, a hinna'u a chôn tau ah, tuni tiang inle zia natna ziak a hin nisin in thina belap in a um zing a hi. Mi hausâ tam tak leh doctor tiang inle a tûktân theilo thina a hi.

Tulai khawvel ah natna COVID-19 ah thina mai hilo in, thina hi tuak ngei ding ka hi ti hi i ngaikhawk ma ma ding uh a hi. COVID-19 natna hi thi theina a hi ti in ngaikhawk in sum leh pai tam tak in etkawl a hi sek ah, a ziak chu thi khak ding i lau ziak a hi. Ahinla, Khrista panglo/neilo ah thi khak ding hi lau um zaw ma ma a hi ti hi gelphâkna a um seklo a bang hi. COVID-19 ziak ah thina hi tu damsung â ding mai a hi'n, himaleh, Jesu panglo/neilo ah thina hi chu vang kumtuang gawtmun/ Gehen chang ding tina a hi.

Mihing dam kum hi kum 70 a hia, himaleh hâtna ziak in kum 80 le a hi maithei hi. Himaleh, a sawtna chu da umna leh lungngaina mai a hi. (Sam 90:10)

Pathian thutep pel theilo chu **thina** hi a hi. (Heb.9:27) Mihing te hin thutep chu sukchawm thei, sukpel thei leh sukbei thei a hi zing lai in, Pathian thutep thina hi chu kuama'n sukpel thei a hi pua'i. Mi lian mi lal, mi hausâ, mi ching mi thiam inle a tuak ngei ngei ding chu thina hi a hi. Mihing â ding ah thina hi

Hin̄na Vâk

khatvei thi guat a hi'n, a zaw leh vaihawmna um ding a hi ti a hi'n. Khristian te, piangthak chate i vangphatnau chu zia vaihawmna ah chun panglo ding i hiu ti i mu'u a hi. (Heb.9:27; IJohan 3:1-2)

Ziagual ah khatvei thina tuak ding i hi ziakun, thi nung ah i tuak ding uh thil pani a um a hi. Ziate chu kumtuang hinna leh kumtuang thina a hi. Zia thu a hin Mi Hausapa leh Jesu'n a hepi Lazar kha a hiu. Luk.16:19

Hun phalo leh ni phalo mun ah um i hi tau a hi. Pathian panglo ah hausakna hin umzia a nei pua, thiamna chitna te hinle Pathian panglo in umzia a neilo a hi. Leng lopi tak Nebukadnezar inle lawsapna a

nei hi. (Danial 4:31)

Mihing in i pel theilo Pathian thutep **thina** khel lam ah hukdam chate i chan ding uh leh i chenna ding un Lalpa'n gam pakhat ei guatpiak a um hi. Zia chu a mitêlte chenna ding mun chu a hi. Zia tak mun lua ding ah chun Lalpa'n nang leh kei ei ko zing a hi. Zia mun chu inkuan kim ah cheng ding in Lalpa'n ei chial zing a hi.

Unau, ngaitua tiam in, zia khawvel hi i khualzinna gam mai a hia, i chen denna ding uh a hi pua'i ti hi Bible inle mu in a um ah, ziaziak ah chun a khawk pen leh a pawimaw pen chu Lalpa Jesu neilo ah khawvel nutsia khak ding hi a hi.

“Haksatna thiguapi hi hinkhua susia leh lungkhamna tun tu ding chauh ah tuak ihi pua, a khen chu i lampi mutthial ding ah Lalpa'n ahun sawl ahi zaw sek hi.”

~Anonymous

Khristian Inkuan

(Job 1:1, Thilsiam thu 6:9-22 Ruth 1:16)

*Ms Tingthiannei
Manipur Area Office*

Inkuan (Family, Household) Thuthung Lui ah Inkuan hi tulai Inkuan matdan sangin a huapzau ma ma ah, tu leh chate khel in a suak teu na tiang le a huap vek ah, Household ti hin inkuan / sungkuan a gen chian pen hi in ngaithei in ah (Thilsiam thu 7:1). Tuni Khristian inkuan ti thupi mang ah holim na ding ah khristian inkuan ti hi a gitlo nau ngaidam a um ah Jesu Khrista a lal leh hukdam pa ding ua pawm te chu khristian inkuan a kiti sek hi. Khristian inkuan siamdawktu ding chu Nu, Pa leh cha e a hiu.

Thilsiam thu 6:9 Noah chu midik leh ama khang ah mite lak ah demna bei (thilphalo bawlo); Noah chu pathian tawh a kivop zing ui. Noah hun lai ah lei hi siatnan a dim ah; hiam ngamna ngen ah dim ahi, hinna nei zosia hindan dik in a hing tapuau a ti Bible in a i mu a hi. Ti gual khawvel a ah um lai in midang te thilphalo bawl gual ah bawl lo in Pathian in lawng tu dingin a hil ah, Pathian in thu a piak gualin a bawl tai (Thilsiamthu 6:22). Noah hunlai tawh tulai khawvel hi tawh kituak ma

ma in ka ngaitua ah, chuti zing lai in, Noah in Pathian in thu a piak gualin a bawl tai ti hi a ngaisang um ma ma hi. Tichun, a inkuan un lawng sung in hukdam in a um u'i. Pa te hi thilphalo bawl lo la hi ah, Pathian thupiak te bep bawl lahi chun la insung mite le hukdamna huang ah puiult thei di la hi.

Job 1:1-5 42:5-6 Job hi demna bei leh mi dik tat thilphalo him him bawl ngailo ti ahi, Job chu zingkal matak ah tho in a chate ko in a thilphalo bawl kha pal ding uh lau in

Hinṅa Vâk

a mimal tin sukthian na ding un maicham a siam sek hi ti i muthei ui. Job gual ah chate a thagau lam hinkhuau a ding ah pang pa hi a lopi khawpmai hi. Pate hi ki-enchian in Khristian inkuan siamna ding hin Job a hi etton in nei leu hin ti a dawum hi. Pathian lau leh thilphalo him him bawlo ding in pan la hitiu.

Ruth 1:16 la pathian chu ka Pathian hihen. Bible zilthiam ten tihin a gen ui, Ruth leh a pawsal Boaz hi a chanchin uh a se lam genna a um kha puai a tiu a hi. Ruth hin Pathian hing a tel ah, Pathian in pawsal phatak a pe kit ah, chuleh, Leng lopi Pathian lau, Pathian in ka dawigual lungthim pu mi ka mu tai ati, Lal David suan tu a hung hita a hi.

Ephesa 6:1 Naupang te haw

Lalpa a chun la nu leh pateu thu zawm un zia chu thil dik a hi ngal in. Chate a ding a thupiak masa pen chu nu leh pa thu mat hi a hi. Nu leh pa in Pathian dawilam bep bawl ah chate Pathian lam ah a kaihuai ua, chaten nu leh pa thu a mat uh chun Khristian inkuan siamdawk tina a hi.

I gen tak gual un Nu, Pa leh Cha ten gitlo kisik ah gitlo ngaidam na chang ah Jesu Khrista Lal leh hukdampa dinga pawm ah, ama dawigual bep bawl ah, khawvel siatna lak ah Pathian dawigual bep ah hinkhua mang te chu Khristian inkuan ti ah ko thei bep ding a hi.

Lalpan Khristian inkuan hithei chiat dingin a thu mal ei sawm piak ta hen.

“Inkuan chengkhawm zing thei te chu Inkuan pauchap khawm zing te a hiu.”

~Anonymous

I Hausa Pen U'i

(Sam 4: 7-8)

By P/P Minthianboi Vaiphei
Kawlhen Pastor Bial

Amasa'n i Bible châng tel uh Sam 4: 7-8 hi a la genchian masa'i tiu. Thuthung Lui Bible khawvel i thíl chun **bu** leh **uain** hin Juda te leh a kiang tuam ua mite hinna ah khan mun pawimaw takmai a chang hi. Isak in Jakob a malzawl ah khan, 'Tichun Pathian in vân daichîm leh lei phatna leh, bu tamtak leh

uain tamtak hun pia hen' ti'n a chapa â ding ah dawisakna sangpen a la lân hi.

Bu leh uain te hi Judate an pawimaw ma ma mai a hia. Genesis 41:48 ah chun, '*Aigupta gam ah kum phat hun kum sagi sung ah bu zosia chu a dawlkhawm ah, khawpi sung ah chun bu a sung khawm ta'n...* ti'n Aigupta gam ah kial a tun kuan in Joseph in a nek ding uh bute a khawlkhawm thu i mu'u ah. Genesis 42:2 ah chun, '*Aigupta gam ah bu a um hi ti ka he hen, thilo ah i damdaw theina ding un zia tak ah chun hang chiau inla, vapuau in, a ti'n.*' tia Jakob chun a chate chu Aigupta ah bu chaw ding in a sawl thu i mu

kit uh a hi kha. Leviticus bung 2 na i sim chun Lalpa kiangah **an thillat** ding dan thu i mu'u ah. A an teu chu a hêknâwn dim dem ua, 'chângbuang' ah siam in Pathian kiang ah uluk tak in a lân sek u'i. A nek leh dawn ding teu ban ah nisin ah a hinsuana ding ua a pawimaw ma ma ziakin nekkhawp ahiloleh kum khat dai ding a nei phawt ua leh amau â ding in lungkhampi ding dang um talo hial a la hi'n ah.

Eiu haw le masang lai ah khan **bu - Tin a za a za ah** neite chu kumkhat sung ah a inkuan ua nekkhawp ding bu nei a hi tak ziakun khawkhat pa/nu kipak pente lak in a la pang hial in au. Tu hun ahin

Hin̄na Vâk

vang bu chîng ah nasep hi
chu i ha bawl talo maithei u'i.
Kihinsuana ding ah nasep chi
chuam chuam te lak ah Solkar
nasep, mani ah nek hawlna
neite, leh naupang zawte chu
lekhasim nalai le hi'itiu.

Chuti a hi zing lai in, mani
nasep ah lawtin hi thil kipak
um tak ahia. Solkar nasem lai
a sepna'u ah kâisâng te, zillai
khat hina ah result hawi tak i
nei hun teu ah hin i kipakna'u
eima ah khumtûp mailo in
insak inthang te haw le i chial
hial sek ua. I kipakna'u ah chun
ei kipakpi ve leu ti'n i kipakna'u
chu luai te, nek ding tui tak tak
ah te'n i latsak sek u'i.

Maleh, Sam ziktu chun
ziagual ah limna leh kipakna
sang ah kipakna nasa zaw
chu ka thinsung sung ah lei
kawipiak hi a tii. Kum 1990 ah
khan Lâ nal tak mai '*Khawvel
ah hausa pen*' (*Richest man on
earth*) ti chu la sak thiam leh la
phuak thiam **Paul Overstreet**
chun a hun phuakdawk ta...
Zia la ah châng 2 na ah chun
tigail 'hin a phuak ah:

*'Lalpa, midang malsawmna
la piak ka la awchat sek*

*ziakin ei ngaidam in,
Keima bep ka la kingaitua
ziak a hi.
Ka kipak ding gual tak in ka
la kipak sek pua,
La malsawmna lei piak
zosia te en pum ah lung awi
mai ding ka la hii'... ti in.*

A thunawn ziagual ahin a
sunzawm kit ah:

*'Ka luchung ua inchung a
um ah
Ka chate haw va leh tai tak
in a um ua
Ka lungsiat ma ma ka zi
ngei le ka kiangah a ipmu
muang ah
Lalpa, ziate hi a hulzia
muthei dingin mit ei pian
Tichun, khawvel ah hausa
pen hi ta'ng ka'...ti in.*

Khaileh, u leh nau, dawitak
te haw, tamtak neilo leuhin le i
neisa te'u ah hin i mamaw teu
chu a la kimten thei a hi.

I lung awi sek lo zia uh hi
chu midang te tawh i la kitekak
zia te a la hi zaw sek eive... I
hinkhua'u ah i mamaw teu bep
buaipi ding i hui chun kiamni
neilo ding a hi. Phatchuam
ngai tak ah sem ah nekkhawp

semdawk tu'n le 'bupang'
a awn hun in a sepkit zel a
ngai sek hi. Nekkhwawp leh
sum leh pai muna kitup i nei
ziak ua kipak ma ma i hi thei
u'i. Zia ban ah chun, kipakna
ding awm tak ah kipak lo hi
thil et lawm hi puan tin, kipak
nachâng helo mihiam chu a
piangsual hi ngei in ah.

I kipakna di pen uh vang
nekkhwawp leh sum leh pai nâk
nei hawi ziak hilo in, Jesu go
lulpen i nei uh hi i kipakna di
pen uh a hi takzet zaw'i.

*'Mihing te sim sem guallo,
Go ka hun nei u'i Lalpa, ka
hausu pen u'i...'*

Simtute zosia Lalpa'n hun
malzawl ta hen.

*A hawi pen chan na ding in a haksu pen palthen a ngai sek
hi.*

*Hepina hawmzak in. La kiang apat kuama lungngai in chia
mang sak kin.*

~Mother Teresa

*La nisin hinkhua mat ah la law daw sang in bang chimu la tu
em ti ngai pawimaw zaw'n.*

~Robert Louis Stevenson

*Lampi khawitak ah'em ah hun tut ding la zawt sang in, lampi
umlo na chu zawt inla la kengnung muthei ding nusia'n.*

~ Ralph Waldo Emerson

Sermon

Lalpa Jesu Min In Bang La Nusia Em?

~ Upa S. Thanglian

Moderator, Tanggam Presbytery

*“Tichun mipite leh a nungzuite chu a ko khawm ah, a kiang un,
‘Kua’n le ka nung a zui nawp chun, ama kihemil in, ama kraws
kiput in ei zui hen’.”*

~ Marka 8:34

Tulai i gam Khristian te hin Khrista nung i zui dan uhi ngaitua kham tak in ka ngaitua ah. Chawlnei mat dan thu ah te, i nitin hindan thu ah te, i nek hawldan ah te, sum leh pai hawldan leh na chuam chuam i sep na ahin Khrista nung i zui tak tak theinau em? Lal Jesu’n Galilee luidung vel a fan lai a khan mite a sudam ah, thilmak te a bawl a, mipi sangnga (5000) a vak lai khan, mipi te lak ah chun, Jesu chu lal ah siam hial a nuam tau a hi kha. Jesu nung i zui nau ahin Juda te gual in Khristian i hina lungawipi mai i tam ua. Chawlnei chan thu ahin le eima taksa lem lawkna ding aum leh kikhawp ding lam gelpha talo, i taksa lawkna ding te kitaisan ngam lo, soal haw lo, mualpho lau mi a kitam talaw ta a hi.

Jesu nungzui masa te khan le a nek hawlina’u khiatla um tak tak te a taisan ua, Pathian mi mat lopi tak tak a hiu kha. I thupi’u in a gen gual in, Jesu nungzui tak tak ding a chun eima kihiatmil a pawimaw ma ma a hi. Eima kihemil ti hin, eima taksa lungthim dawidan ah chia talo ah, Thagau

Thiangtho eima ah um pen dawidan ah chia ta tina a hi. Mihing in dik beklo lehle a pha i pawm thei tiang a um sek ah, maleh Pathian in a pawm thei ngailo a hi. Mihausa kumtuang hinna hawlpa khan le dan thupiak zosia a zuikim ah, himaleh Jesu’n, ‘a pha’i kumtuang hinna chang inla’ a

ti puai, a nutsia ding a khiatla pen khawvel hausakna a nei kha a nutsia ngamlo ziakin, Lal Jesu a zui theilo a hi.

Awle! Unau nanging le la nutsia ding tampi nei ngei ding la hin, sum leh pai la hawlna ah te, nek leh chak la hawlna ah te, la taksa lungthim lua lianpen, la khiakla pen kha Lalpa Jesu min in nusia in, ziaphat chuleh Lalpa Jesu nungzui diktak hin la tin, kumtuang hinna mu ta'n la.

Mosi khan le Aigupta lengpa chapa hitheina a taisan/nutsia ngam zia in van mi leh leimi te kikal ah palai ding in Pathian in a guat a hi kha. A

lopi na e! Etsakna'n numei te hinle a insung ah a nu leh pa, a u leh nau leh insung ah nawp a sakna zosia kha a nutsia ngam ma khan a pawsal zuitu ti thei a hi pua maleh ziate haw zosia kha a hung nutsia phatleh a pawsal zuitu phatak a hi sek hi. Ziagual a chun unau nangle la nutsia ding te kha nusia'n la, lungthim thiangtho tak in Lalpa Jesu zui le chun la taksa a ding ah chawldamna hi'ntin, la thagau a ding in kumtuang hinna hi ding a hi.

Taksa lungthim ah i khiakla te leh ngainat te zosia Lalpa Jesu min ah nusia ngam ding in Lalpa'n a thu malzawl ta hen.

“Haksatna iti haw hi uphawk gual ah melsia himaleh, sana a paw ve tei sek hi.”

~William Shakespeare

Thagau Thiangtho I Ti Hi Kua A hi Em ?

-Upa Luapau

Thagau Thiangtho i ti hi Pathian ah mi pathum, amau chu Pathian, Chapa Pathian chuleh Thagau Thiangtho Pathian, amau chu din mun kibang, hina kibang, thilhitheina kibang ahiu ti I bible in ei gen chian ah. Pathian chu Thagau ahin ama ho dingte chun Thagau leh thutak a iho ding uh ahi ti imuu a hi (John 4:24).

Malai apatin Thagau Thiangtho nasep leh ala pawmdan uh a kibang paw thei mamah ah, Kochuam kinial na tamtak ala um sek hi. Tutiang ah hin le zia gual ah kinialna leh pawmdan hi achuam chuam a um zing sek nalai ahi.

Hun masa lai achun ‘Thagau Thiangtho ‘ala ki genna, Hebrai pau in ‘Ruach ti ahia, Greek pau in ‘ Pneuma ‘ti ahi. A um zia chu- hat|hui|/hu tina ahi. Genesis 2:7, 6:17. Jiachu Lalpa Thagau nasep na liau liau ahi Job 26:13. Thagau Thiangtho chu hatna petu, hinna petu, thilhithei na petu, ama chu bangkim bawlthei ama chu Pathian ah mi mamah ahi ti imu thei ui.

Thagau thiangtho kigenna te 1: Thagau Thiangtho hi thuthunglui lam in tampi muding a um pua, Isai 63:10, Sam 51:11, Lalpa launa thagau vaihawmna thagau, felna leh hiat theina thagau, lemguat na thagau tite muu hi, thuthungthak lam in chu Thagau Thiangtho kitina tamveitak muu ahi. Ziate chu Jesu Krista thagau, Jesu Thagau, Lalpa Pathian Thagau, Lopina Thagau, Thianthona thagau, Hinna Thagau, Pathian Chapa thagau, Pathian hing thagau tite in I muu ahi hebrai9:14, phillippi 1:9, Nosepte 16:17, Romte 1:4, Galatia 4:6, korinth 3:3 leh adang dang inle muding a um nalai hi

2. Mihing Mizia nei ahi : Thagau thiangtho hi mihing mizia nei ahi doan i Bible in lom chuam chuamin a gen o, Grik pau

Thuthung Thak bute a chun, pawsal genna a mat ahi deu sek hi. Numei akigen phat leh Ekaine' akiti sek a, John 14:26,16:13-15 zia hin Thagau thiangtho chu Van ahem, Thil ahem hilo in mihing mizia nei ngei ahi ti ei hilchian hi, aziak chu, Thagau thiangtho kigena phawt in Ekaines' pawsal genna thumal matsek ahi ziakin ama hi mihing a le pawsal genna tawh kibanga zik ahi ziakin mihing mizia nei ngei chu ahinai ti imuu ahi. Mihing pilna leh dowitelna petu le ahikit hi. Ama hin mihing te hi pianthakna lampi in apui sek hi. Gilo ahui ti aki hiotsak sek bawk hi. Ama Thagau Thiangtho hin I Lalpau Jesu Khrista thupha pulaktu in apang zing a, a mite suala puk ta te tiangle kilekit nopna lungthim ei neisak in, Lal Jesu kiang lam in ei puilut tu'n apang zing sek hi (John 3:5, 16:8-14,26, Nasepte 13:2, Thupil 2:7).

Ama hi suk lungngai thei, suk thasiat thei, dodal thei, gensiat leh sawisak thei le ahi. (Eph 4:30, Isai 63:10, Heb 10:

29) zia te a pat hin mihing mizia nei ahi ti imu thei ui.

3. Thagau Thiangtho chu Pathian ahi: Thagau Thiangtho chu mihing mizia nei bep hilo in ama chu Pathian ahi' ti Bible in ei gen kit hi. Genesis 1:2, Pathian a mihing pathum te Pa Pathian, Chapa Pathian leh Thagau Thiangtho Pathian amau chu hina kibang, thilhitheina kibang leh bangkim siomtu ahui ti imuu a, zia hin Thagau Thiangtho' chu Pathian ahi ti akichian khawp mai hi. Matthai 28: 19,11 Kor 13: 14, Pa leh Chapa leh Thagau Thiangtho min in baptis un ti Lal Jesun a zilsak te thu apia iIKor 13:14 Lalpa Jesu lungsiatna te, Pa Pathian hepinate leh Thagau Thiangtho hepi nate leh powl nate la kiangun um ta hen ti in. Sawichak Paul in le agen a, zia ziak tak ahin Thagau Thiangtho chu Pathian ahi ti akichian mama hi.

4. Thagau Thiangtho chu Pa leh chapa apat hung pawt ahi: Kochuam masate hun lai a ala buaiipi mama ziong uh chu, Pa, Chapa leh Thagau

Hin̄na Vâk

Thiangtho kilaichinna thu hi ahi, Khawthong lom Kochuam (Rom) te leh Khawsak lam Kochuam (Greek) leh Orthodox te kinialna pen chu Thagau Thiangtho hung pawt thu leh Chapa Lal Jesu (filiogue) pan sak ding nuam lo leh anuam lawi thu hi ahi Lal Jesun, Thamuantu, thagau thiangtho Pa'n kamin a ahun sawl ding khan Jhn 14:26 ti thu leh Pa apat hungpawt Thagau diktak chu Jhn 15:26 ti thute panchak a nei in Constantinople Kikhawmpi chun, Thagau Thiangtho chu Pa apat hungpawt ngei ahi ti in thupukna asiam ui. Zia thu hi Khawsaklam Kochuam te pom dan le ahi. Zia nunga chun Augustine chun Pa, Chapa apat hung pawt ahi ti a zilsak kit a, zia hin Khawsak leh Khawthang Kochuam a

kinialina lianpi asuasak ta, kum 100 lam hial ala buai ui. AD 589 Kum in Spain gam a "Toledo" kikhawmpi chun Thagau Thiangtho chu Pa, Chapa apat hung pawt Thagau Thiangtho ti in apawm tau ahi. Pa leh Chapa nialkal in thagau thiangtho chun bangma asem theilo ahi tina le ahingal mai a tuni tiang ahin eima Kochuam inle Pa leh Chapa leh Thagau Thiangtho min in kal isuan to jel tau ahi. Thagau Thiangtho pui huaina dawng tute chun bangtik lai inle haksatna tawp khawk tuak maleu amau apanpi, azilita, akaitho kit sek a, a thawk gimnau zosia chu kipak nan asangthei tau ahi. Simtu zosia Thagau Thiangtho mu chian leh hechian thei dingin Lalpan hun malsawm ta hen, Amen.

"A zangaina leh Hepina'n ahun kepbit zaw lo na ding mun tiang in Pathian chun a thu'n hun um sak lo hial in a."

~Bernadette Devlin

Khawvel ah thilsiam, hinna nei a tawi thei zosian lauding, kichak ding hi i nei chiat ua. Khenkhat chu a mel lau um, khenkhat chu a gitlo ziak ua kilau, khenkhat chu a hat ma ma ziak ah ilau bang a um hi. Zia launa chu mihing ten i nei lian ma ma mai ui. Ziakachun, lau ding chu bang ahia, bang gual ah launa chu mang ding ihu em ti hi ‘*Pathian launa*’ tawh kisai in thil dan **chi thum** apat in a la enkhawm hitiu.

1. Pathian a lau ziak ah kismang (Thilsiam thu 3:10)

Pathian thilsiam lak in mihing te hi a lopipen ahi. Thilsiam dang zosia sang ah ngaituana mangthei ding ah siam ihu. Pathian chun sualam ah huan liantak mai a siamna ah chun Adam leh Evi a kawhi. Zia huansung ah chun Adam te nupan chu lungmuang tak in lau nei kêilo in nupan hinkhua ahun mang pantau ah. Pathian tawh kipawl khawm zing kawm ah lim leh thamuang tak in hinkhua amang ua, a kiang ua thupiak umsun chu - huansung ah um theiga dang te nethei vek ding leh alai ah Sia leh Pha hiatna theiga pen vang nek lo hial ding ti ah kham

chak ahui. Adam chun theiga chu ahun nekkhak tei tei zaw in launa’n a dimta. Lau ding neilo thamuang tak ah umsek pa kha hundang ah ala kithuapi zing Pathian ngei in ‘Adam khawi ah um lahitam?’ tia a hun hawl a khan ‘Lalpa ka lau ah kala kisel ahi’ a ti daih ta a hi kha..

2. Pathian zam mangsan gua (Jonah 1:1-17)

B.C. 780 tuam lai ah Assuria te vanglai hun in khua leh khua kibulu ah ahat zaw ding leh a thunei zaw ding ki chuna ah thunei utna a lian ma ma ah, mitin chu gal lâu in ala um ui. Chuti lai ah chun, mi pakhat a melma ten apa a thapiak uh Jonah kiang ah chun Lalpa thu

Hinna Vâk

a hungtung a, ‘va chia inla, Ninevi khua ah thu va gen in’ ti’n sawl in a umtai. Maleh, Jonah chu Lalpa sawlna a chun a chia nuam tapua. Pathian chu zammang san ding gua’n a kipan ah, Tarsis lam zuan in tuichung ah kuang in a chia tai. Ama ki ngaitua dan a chun Ninevi khua ah thu leh la bangma vahil lo ding, a sawltu Pathian le zammang san veng veng ding a ti hin’ ah. A lungtup chu lawting gual in lang maleh, tuichung in buaina namên lo ahung tuak ta. Jonah lochalna ziakin kuang ah a chuanpi te zosia hinna le dengdel tak in a umtai. Kuang chu a tumlo na dingin Lawngpu te chun mipite chu a pathian chiat uh ho dingin thu a pe tau ah.

Jonah vang lawng meilam in nuamtak in ala ipmu.. Lawngpu lianpen in ahung mudawk phat in, ‘Aw nang ipmut thût pa, bang bawl la hem? Tho inla la Pathian ko in, i manthai lona dingun’ ti’n ahung kikokhum tai. Lawng ah chuangte chu a beidawn ma ma tak ziakun bang pathian pen in ei hukdawk theidiam tia lampi a

hiat zosiau mang maidan ahiau. Kua ziak ah buaina huaisia hi tuak ihu em ti hiatna dingin Ai a san kit ua leh Jonah chungin a chutai. Ziagual lawm ah buaina ichung ua a tun tak mai hi bang ziak ahem gen in. Bang na sem la hem? Khawi ah hung kipan ah khawitak gam mi lahi em? ti’n a dawng tau ah. Jonah â dingin le lampi dang um talo in a kipuung dawk tai. Ama chun, “Hebrai mi kahin, Lalpa vân Pathian tuisuagiat leh khawmual siampa ho mi kahi” ti’n a dawnhu tai. Mak ma ma ziang chu Pathian lâu ah zamsan ding a guat bep hilo ah Ninevi khua ah a thupiak le gen utlo pa chun tuisuagiat chung in a zamsan guat Pathian hina diktak chu ama kam ngei in a puang dawk tamai ahi.

3. Pathian lâu ah Insung maicham siam zing

Nasepte bung 10 na i sim chun Pathian lautak ah inkuan ki enkawl zing Kornelia te chanchin a kimu. Amau hin mite mitmu leh Pathian mitmu ah le tepte kham hinkhua neitak ah hinkhua a mat zing

lai un a pauchapna hiatpiak ah um ahi thu Vânsawlchak in ava hil hi. Zia thu a hiat phat ah chun Peter ko dingin mi a sawl ngal ah. Lalpa apat thu pawt he dingin ama leh a insung mite Lalpa ma ah um zing a hi dan uh hangsan tak in a gen hi.

Khaile, simtu dawitak te Pathian launa thîldan pathum apat in iholim tau ah. Zia kipat ahin Pathian laudan pha zildaw ngei ikinem ui. Tulai ah gingtu tamtak te i umdan teu suithak kit hitiu. I kichei dan, i holim

nawpna lam, i sum laklut dan, i Pathian biakdan leh i khawvel hinkhua matdan teu Pathian hing nei, bia leh lâu te umdan dingin a kilawm nadia aw..? Pathian laute chun a thupiak a zawm sek ui. Adam in a kisel mangsan gua, Jonah khan a zammang san thaw gawkit ah. Maleh, Kornelia in vang Insung maicham siam in a biak uh Pathian chu nisin in aho zing ui. Lalpa laudan kilawm tak tawh khawvel hinkhua mangthei dingin Lalpa'n a thu malsawm taken...

“Japan ah chun kuang hi a sukkek khak phat ua leh a kek hal haw chu chawmkhawm in sana tui in a zawpmat kit sek ua, zia chun a kek masang sang in zem hawitak asiam dawk sek hi. Zia chu thil sia sa kisiam thak chu a etlawm dan etsakna'n amang uh a hi.

Mihing te hile zia gual ma chun bang gual in siatna tuak in, i hinkhua hin siamphat zawlo ding gual ah siatna tuak in, Pathian leh mihing mit tung zolo ah gitlona bawl ah siatna tuak gual in kigel ma lehin le, i kisiam thak ah, zia kuang kisiam thak gual ah, i phatlo na lai te kha siamthak ah Pathian thu in a mal mal te kha belkhawm thak le hin, hinkhua masa sang in a nunung zaw chun Pathian hawina hung sulang ngei in ah.”

Panglian Pastor Bial Review

*Pro. Pastor H. Lamthianmuan
Panglian*

Amasa'n Panglian Pastor Bial review zik ding ah Editorial Board apat chialna kadawn ziak in kipak thu ka gen a hi. A sung thu hi mimal thilna mai ahia, simtu zosia'n a lawkpi ngei ka kinem hi.

Thillawkna: Panglian Pastor Bial hi Mizoram Synod, Manipur Area huamsung ah Lamka South Presbytery nuai ah Pastor Bial pakhat a hi. A umna hi Manipur State Sim tawp lam ah, 60 A/C Singngat Sub-Division gamkai sung ah um ahia, Churachandpur Police Station (zero point) apat Km 16 vel ah gamla a hi. Panglian Pastor Bial in a huamkhak Kochuam piting paguk a um ua, zia lak ah Kochuam pali hi a khua pumpi'n MPCS member ahiu ah, Kochuam pani te lak ah pakhat zawk khua hausa hi MPCS himaleh, zia Kochuam te umna khuasung chu Kochuam dang dang tawh chengkhawm leh khawsa khawm a hiu.

A sungthu ahi'n, Bial khangthu leh dindaw kum

te, Bial station leh Pastor te, Bial Kikhawmpi mat zat leh kisimna (statistic) tangpi te, Bial sung ah Kochuam tin Lalgam nasepna leh a pawimaw dang dang taksa leh thagau ah masawna leh masawn zelna ding ah hiat thei tiang tiang taklang ding i hiu.

1. Bial Khangthu:

Pastor Bial dindaw masang in Kochuam te hi EOC, RCG, CNI leh Independent apat hung lutkhawm in, Mizoram Synod nuai ah 16th Dec. 2001 lawplut ni apat Dec. 2008 chan Manipur Presbytery huamsung ah *Lamka chung Bial* ah Kochuam pagiat te lak in a la pang u'i. (Zia lai ah chun B. Tuallian Kochuam hi Lamka Pastor Bial ah a um zing u'i.) Lamka Chung Bial ah Kochuam te chu;

Lingsiphai, Mata, New Mata, Buallian, Panglian, Geltamjang, Changlian leh S. Zezaw te ahiu.

Official tak ah Panglian Pastor Bial dindaw ni, January 11, 2009 ni ahin Rev. Lalding-luaia, Moderator, Manipur Presbytery in Panglian Pastor Bial hawna tawh Pastor kawidetna (Induction Service) nei in, kikhawpna programme le lawting tak in a la mang uh a hi. Panglian Pastor Bial dindaw apat in, Bial Kochuam Numei Pawl leh Bial Khristian Khanglai Pawl te le a dingdawk ngal u'i. (cf. PPBK -7na GEN. VII/25th Apr. 2015).

Panglian Bialtu Pastor te leh a bial kum te'u chu:

- a) Rev. P.K. Lianmang (2009)
- b) Rev. S. Mangminthang (2010)
- c) Rev. K. Jama Vaiphei (2010-2016)
- d) Rev. Paulalsiam (2017-2019)
- e) Rev. Ngurthanmawia Sailo (2020)
- f) Rev. Thangneipau Vaiphei (2021- till date) leh Pro. Pastor H. Lamthianmuan (2020- till date) te a hiu.

Chuleh, lawi upa te leh

Kochuam puitu masate lemguatna dungzui in Panglian khua hi, a lailung pen leh Pastor chutphana mun (station) hi ding in Pastor Quarter a la lemguat uh a hi.

2. Bial Kikhawmpi mat zat:

Panglian Pastor Bial Kikhawmpi 1-veina ding in, April 3rd – 5th, 2009 ni'n Panglian Kochuam Biak In ah Thagau lam thupi "*Masawn zel hitiu*" (Phil. 3:16) ti mangcha in ala mangpan ui. Zia hun ah Bial Puipate ahiu leh: Rev. P. K. Lianmang (Chairman), Upa Sawikhanpau, Secy. (Sr.), Upa Jangpau, Secy. (Jr.), Upa Thongngam (Treasurer Synod), Upa Pautinlal (Bial Treasurer) leh Upa Lamnek (Statistician) te ahiu. Zia kum ah Bial Kikhawmpi Budget siamdan leh tuakkhawm dan chu suankuan tin apat cheng 100/- (per house) tuakkhawm chiat in Budget ala siampau uhi. Kum 2012 in, Changlian Kochuam hi sungkuan pakhat chauh MPCS ahia, Lamka lam ah apem tak zia in Panglian Pastor Bial apat Changlian Kochuam um talo a hi.

Hinnga Vâk

Kum 2012 September 16th ni'n MPCs, Singngat Kochuam Rev. J. Lalremsiama (A/S, Manipur Area) leh Bialtu Pastor Rev. K. Jama Vaiphei malat na'n Biak In thak ala hawngdawk ui. Chuleh, Kum 2016 September 7 ni'n MPCs, Muallum Kochuam Rev. Zoramawia (A/S, Manipur Area) leh Bialtu Pastor Rev. K. Jama Vaiphei malat na'n Biak In thak ala hawngdawk kit uhi. Tukum 2021 tiang ah Panglian Pastor Bial Kikhawmpi hi Singngat Kochuam ah vel

13-veina a la mang tau a hi.

3. Bial Kisimna:

Bial sung ahin, kampau kimang pali vel a um ah, B. Tuallian leh Singngat Kochuam te hin Vaiphei pau a mang chik ua, Changlian, S. Zezaw leh M.T. Geltam Kochuam te'n Thangkhal pau a mang nasa'u hi. Chun, Muallum Kochuam te'n Zou pau chiktak a mang kit ua, Panglian Kochuam te'n Thado pau a mang tangpi uhi.

Kum 2009 Bial Kikhawmpi kisimna masapen chu ziagual a hi:

Kochuam	DZK	Upa zat	In zat	Member zosia	School Grant	Teacher	Zillai
Panglian	131	3	45	317	1	4	73
S. Zezaw	136	4	39	240	1	3	47
B. Tuallian	61	1	21	96	x	x	x
Geltamjang	26	1	9	49	1	1	12
Changlian	7	1	1	8	x	x	x

Tukum 2021 tiang ah kisimna ahi leh ziagual a hi —

Kochuam	DZK	Upa zat	In zat	Member zosia	Mithi zat	E/T	Thunun
Panglian	129	4	40	225	1	x	4
S. Zezaw	138	4	40	221	1	2	x
B. Tuallian	14	1	4	24	x	x	1
M.T.Geltam	37	1	13	55	x	x	1
Singngat	65	2	18	102	2	x	x
Muallum	63	2	22	116	2	x	2

Kum 2015 ah Mizoram Synod, Manipur Area ah Primary School Grant zosia suktawp ahia, Panglian Pastor Bial ale School Grant pathum ala um ah, aleng ah tawpsak ahi tai. Himaleh, MA committee leh A/S lemsakna dungzui in S. Zezaw khua SSA (Govt.) ah Contract System ah sem ding Evan. Teacher pani kawi zing ahi (cf. PPBK-7na GEN. X/25th Apr. 2015). Bial dindaw apat Evangelist/ Evan. Teacher ala um ta te: Mr. G.T. Zuana (Pension), Mr. Ngulkholun, Mr. Hautinpau (Pension), Mr. Nengthianlal (Pension), Mr. L. David leh Mr. Letmang.

4. Thilpiak lam

Kum 2020-21 financial year ah Panglian Pastor Bial apat Tualsung sum mudaw zat chu – Cheng 5,85,910 ahia, PDK 1,265 ahi. Chuleh, Synod Sum submit zosia zat chu – Cheng 12,09,485 ahia, PDK 2,612 ahi. I Pathian thu in “Amau chu a gau ah kipat in hemai in lau, ati gual in” (Matt. 7:16) Panglian Pastor Bial le zia gual chu ahi. Panglian Pastor Bial sung ah Kochuam paguk

te apat Thilpiak dan te’u: Anchang ham te, Pathian gam thawlawm (Dâk bawm) te, Sawm ah khat thilpiak chuam chuam apat; huan thaiga te, Louma apat Busun te, Gancha gual apat te, leh Kochuam thakuan natiang in a sepdaw dan leh a thilpiak dan te’u a kibang tanggual hi.

Himaleh, Bial sung ah Khenkhat thilpiak lam ahin, Kochuam tin apat sungkuan lawdaw (monthly income) zat chet umlo maleh, a piaklut dan uh aki bang puai. Khenkhat in a nithalaw sawm ah khat diktak ah pia a umlai ua, khenkhat in ngamtawk leh kiphah dan dan ah pia le a um kit ui. Chun, sungkuan khenkhat (family monthly income) Sawm ah khat hi Sungkuan Pa/Nu pen piak ding chauh in a ngaikit ui. Sungkuan khenkhat in Pathian gam thawlawm bawm dawl sin leh, a um na helo in a um ua, Kochuam khenkhat vang in Pathian gam thawlawm (Dâk bawm) mangthei nailo le a um bawk ui. Thilpiak thawlawm dawldaw sun sun te leh Sawm ah khat lakkhawm te chu,

Hin̄na Vâk

Synod dan dung zui ah (ratio 5:3:2) khen thei nailo le a um nalai uhi.

5. Khawtang leh Sakhaw lam

Kochuam tin ah kkuatang nasep khawmna lam ahin, a taima thei khawpmai ui, etsakna'n Job thakuan (MGNREGS), Political drive (Election), Social gathering leh khuasung lawkna ding ahi chun pan ala hawi ma mau hi. Chun, nek leh dawn hawlna leh sum hawlna kawng ah a sepdaw dan uh chu; thingsat ah nekhawl, kangleibû bawl, thai chîn, gancha vak, sanga mat, vanzuak leh gamvak te apat sungkuan vâk leh chawm tangpi ahiu. Pathian malsawmna a dawngchiat ua, a khut sepgim ga te'u apat kito del in, panpi ngai talua a um puau hi.

Sakhuana lam ahin, Sawlkar leh i Khawmpi'n Lock down a puan masang in, Biakna Kikhawp tuipi dan leh limpi zawng aki bang dial dial hi. Kochuam piting kikhawpni (Nilai, Kigin leh Pathian ni

zân) te hin, programme fel leh kitup tak ah guanggal hisek maleh, lawting saktu ding a vatsek hi. Pathian ni biakna kikhawp chauh hi Pathian pak leh chawihawina hun a batna tiang a um sek hi. Kochuam khenkhat *Pathian biak kikhawp puihuaina Bû* zuithei nailo le a um ua, chun, Biak In Dak khet chungchang ah, mumal tak leh hunbi neitak ah dâk khetdan natiang bawl thei nailo lê a um kit ui. Chuleh, Biak In khenkhat chu RCC building sung ah kikhawpna a neithe i lai ua, khenkhat chu Community Hall bêl ham ham le a um kit uhi.

I Khawmpi'n Sawlkar zathuap na leh Kochuam vengbit na ding ah, programme siamlo phawt ding ati lai in, 'Kochuam Aw' hethiam thei nailo leh Lawiupa te thu ngai piak nachang henailo lê a um kit uhi. Panglian Pastor Bial sung ah KNP leh KKP dindaw ahi pat in hawitak cha a chiato zel ua, Kochuam tin KNP biakna kikhawp hi CKNP kikhawpni tawh kitang gual takin a kikhawm thei ua, KKP

a hileh vang, CKKP a tamzaw kikhawp ni tawh a kibang thei nai ta di lo ahi.

Thukhaikhawm

Panglian Pastor Bial sung hî, thu bailam tak ah khualchîan leh chawmkim cha genchîan ziang thei ahilo natiang a um hi. A ziakchu, Kochuam Aw (Kochuam Dan) sang in Khawtang Aw (Khuasung ki vaihawmna) chiazaw a batna tiang a umsek hi. Pathian thu ah i mu gual un, Kochuam ‘Aw’ chuh Pathian

‘Aw’ i tia, Kochuam te chu pumkhat tak ah, ki thugual tak leh thuawi tak ah Lalpa Jesu dikna Dan zawmtu te ding ihu ah, I Khawmpi’n sep leh bawlding ah thu eipiak teu hi, zawm leh zui guasek leu hin pha ma ma ding ahi. Panglian Pastor Bial hi, Presbyterian chiadan zilto zel leh Kochuam pitin lam manaw tozel ahi’u ah, Pathian malsawmna a dawn na chung un, kipumkhat tak leh ki lunggual tak ah Kochuam Aw ngaichang thei zel ding in dawisakna i lân a hi.

khawvel hi bang gual ta bep ah diklo atam? Jesu sang in i gitlona’u i ngaina zaw ta mai ui.

livingchristian.org

Hepi vak talaw ziang kin.

Pau tam talaw kin.

Kinem sang talaw kin.

Gingcha vak talw kin.

Haisan vak talaw kin.

Kochuam Leh Modernism

~ Pastor Summinlian
New Delhi

Modernism: *Moderinism* ti kampau hi kum zabi 19-na lai lung vel ah Roman Catholic Kochuam sung a pat hung piangdawk a hi. Kochuam chiadan pangai dawikhawp lo ah, kochuam chiadan pha zaw ah sukdanglam gua ah pan latu te chu *Modernist* ti ahiu ah, zia zilsakna chu **Modernism** ti a hung hi tai. *Modernist* te lak ah puitu challeng deu pani te chu Alfred Loisy leh George Tyrell te ahiu. *Modernist* te chun a hun lai ua kochuam chu a mu khawlo ma ma mai ua, zia khawvel pilna sang zel tawh kigual ah kochuam hi kipuihuai a dawih uh a hi. *Modernism* lam ah dutui te chun, Bible hi Bible ma ah hilchian mai lo in, science tawh kituak ah hilchian hileh a tiu a hi. Pathian thu hi a hun lai uh khawvel hindan tawh kituak ah chiapi chu a dawidan uh a hi.

Modernism in Kochuam a sukbuai dan: Tuma lam hun ah chun mihing te hiatna hi a sang nai lo ziak in thilsiam zosia hi, mihing te hiatphak ding gual hi lo, a siamtu Pathian chauh in a thunuai ah a kawih hi in a ngâi uh a hi. Kum zabi 15 hun lai ah, Copernicus in *planet* ten nisa a vel u'i ti a hung mudawk ah, zia thu chu kochuam in a taksang pua, Copernicus thil mu dawkhak chu a nawl piak bep hilo in, zia thu chu gen kit ta lo ding in a khap hial uh a hi. Himaleh, hun a hung chia liam zel ah,

awl awl in kochuam in le a dik zia a hung mu dawkhak ta a hi. Mihing te pilna leh thiamna a hung sang to zel ah, *Modernism* te thiltup pen chu a hileh khawvel thu leh Pathian thu hi a kituak ah a chiakhawm zel lo a hi chun, kochuam hi miten hung mu khawlo ding in a ngâi uh a hi. Zia ziak ah chun, kochuam hin tulai pilna leh thiamna mâitua ding dan a zil zel hung pawimaw ding a hi. Zia chungchang ah hi ngaidan kibang vek lo ding a hi ziak in thutawp siam haksa ma ma ding a hi.

Kochuam leh Modernism:

Kochuam ah Lalgam nasepna hi le a hun lai khawvel tawh kituak ah chiapi zel hi hung pawimaw zel ding a hi. A chutilo leh, tulai mite hin kochuam hi malai mite umkhawmna ah ngâi mai ding a hi ziak un, kochuam in a thiltup pi pen Chanchinpha genna ahin haksatna tuak mai ding a hi. Ahinlah tulai tawh kituak talua ah kochuam a chia a hi chun haksatna kochuam in a tuak kit thei hi. Billy Graham thugen, “La veilam in newspaper chawi inla, la changlam ah Bible chawi in.” Zia ziak chun, kochuam hi tulai tawh kituak talua a chia khak leh kochuam â ding ah pawl thei ding te en zui hitiu.

(1) Tulai takluat a lau um hi:

Thil zosia hin talua a nei vek hi. Paul in, “Dan nei lo mite ka laklut theina ding in, dan neilo mite gual in ka um sek hi,” a ti zing lai in “zia khawvel dan gual ahin um kiu in” a ti kit zel hi. Zia ziak ah chun, kochuam sung ah hi tulai dan a hi chulam tia, thil bawl puat puat chi hi kêi lo a hi, thil hi a chintawk hiat hi a hawi

pen hi. Etsakna in, *camping* hi thagau mangthai hukdamna huang ah puilutna ding ah matchak pawimaw ma ma a hi. Himaleh, kochuam a ngui deu sin leh “*Camping/crusade* nei hitiu”, ti zing in, mani tualsung kochuam thagau lam ah kichawp guatna lungthim i nei lo ua leh, *camping/crusade* ngawlvei thei a hi. *Crusade/Camping* nei ka sawiselna vang a hi puai.

(2) Kochuam chiadan:

Lawng hi tui chung ah um ahin, ahin lawng sung ah tui a ha lut takluat phatleh tui sung in lawng chu a tum sek hi. Zia gual ah chun, kochuam hi khawvel ah um ahin, kochuam sung ah khawvel thil a ha lut takluat phatleh, kochuam mel khawvel thil in a lia sek a hi. Kochuam mite hin *worship* ti leh *fellowship* ti hi khendan thiam ding a hi. I Biak In teu ahin Pathian i biaknau ah chindan zat chuam chuam i nga deu deu ua, himaleh, a betute thinlung hi a *pawnlang* deu deu a bang hi.

(3) Changkanna lau um:

Tuma lam deu vel ah khan Sapgam kochuam te khu a

Hinna Vâk

hing ma mau ah, i gam ua Chanchinpha hun pawlut te le a hiu. Himaleh, tulai changkanna ten kochuam a hung ne se deu deu ah, Pathian sang ah ngai pawimaw zawk ding leh buai pi zawk ding a hau deu deu zaw tau ah, Biak In tam tak ah, biak In kai ding a um tapuau ah, Pathian biak sang in khawvel thil in a lungthim uh a lua dim zaw ta a hi. Ei uh lak in le zia thagau chun na a sem zing a hi. Khawvel changkanna hi Pathian ei gamlat saktu a hi leh vang, malsawmna hilo in hansia hung hi ding a hi.

Modernism hin khawvel thil ah changkanna a hung pawdawk ah, ahi'n Pathian ginna kawng ah kithâdâna a hung hingdawk kit hi. Tulai ah i Khristian hindan teu hi le en leuhin, khawvel lam thil ah chun i changkang deu deu ua, Pathian biak sang ah biak zawk ding i hau deu deu tau a hi. Biak In leh a sung cheibawl dan in, ma i sawn zing lai ua hin, biak In sung ah Pathian i biaknau thinlung hi a pawnlang deu deu a hi. Biak In nei hawi lam ah ki-el sang un, biak In ngainatna lam ah ki-el zaw thei

leuhin Pathian kipakna hi zaw ding a hi. Ahi'n, Biak In hawi nei chu haisan diak lo in.

4. ***Liberal hinkhua lau um hi:*** Tulai Khristian te i ki-etchianna ding ua pha chu, Pathian thu i pawm dan un i dutui ma mau ah, himaleh, hinkhua ah dutuina i tasam deu deu uh a hi. A gen lam ah vang thiam, himaleh, i gen gual ua hinkhua mat i gaw kit ta lo uh a hi, zia te hi a hi *liberal* hinkhua kiti chu. Tulai Khristian te hin Pathian thu hiat be talo in i hiatsa siau hi zui ta leuhin le kumtuang hinna neina ding ah chun a huntawk ma ma a hi. Malai ah i pi leh pu teu in Khristian ti sang in Pathian thu awi ti min hi a la dawî zaw'u a hi, a hinkhua'u kha belchian a dawl ma ma hi, tulai ah Khristian kiti tak tak te gual a hin chawpawl hinkhua a mang puau hi.

5. ***Modernism hin I Khristian hinkhua'u hi khawvel thil tawh a hung chawk hel nasa ma ma mai hi.*** Khristian kiti ngal ah kikhawm ngai kêi lo, Bible sim ngai kêi lo, pauchap ngai lo, Khristian hi ngal ah zuau gen,

lêpgûk, uire, khamthei bawl
haisan diak lo hung pung deu
deu nalai ding i hui. Pathian
thu gen tui ma ma, himaleh
kochuam ngâina lo, zia gual
mite hin chu , a thu ah chun ka
chiang ma ma hi ti zing kawm
in a hinkhua'u ah chu chiang
kêi lo ding a hui.

Awle, i thupi'u Kochuam
leh *Modernism* ti hi bukim lo
tak in i gen tau ah, zia gual ahin
chawmcha'n thukhâkna nei

hitiu. Kochuam hi Pathian in
gitlona lak ah kipat a kochuam,
Lal Jesu thisan ah a chawkdaw,
Thagau Thiangtho in Lalpa
nasem ding ah a guat chuam
a hi [Nas. 20:28]. Kochuam
hi khawvel ah um, himaleh,
khawvel apat pawt hilo. Mi
thiangtho te kipawlkhawmna
a hi zing lai ah, migilo te
huaikhawmtu a hi. Kochuam hi
sual in a subuai thei, himaleh,
sual in a zaw theilo ding ah
hukdamna bâng ah ki-ûm a hi.

Midang te'n a Pathian uh a puak thaw ua, eiuh Pathian in vang
ei uh ei paw sek ah;

Midangte'n a Pathian uh nek ding an a pia sek ua, eiuh Pathian
in vang ei uh ei vak zaw ahi;

Midangte'n a Pathian uh a ding in gal a do sek ua, eiuh Pathian
in vang ei uh a ding in gal ei zaw piak tai.

Limna kipakna hi i dawî zosia nei ziak ahi pua, i nei kham kham
ah lunawina hi a hizaw a hi.

Hiṅṅa Vâk

Naupang Sunday School Khawmpi Banggual In I Mang Sek Nau Em?

*Pu Lalbiaklian
Lamka Kochuam*

Mizo Sunday School Union Kaihuaina i zawp ua kipat hin Naupang Sunday School Khawmpi hi i hung mang pan tau ah, dawidan leh ngaikhâwk dante a kibatlo dungzui in, i Naupang Sunday School Khawmpi mat dan uh le kibang vek khel pua'n a. Khenkhat chun naupangte kidemna chi chuam chuam guanggal piak in hun i mat lai un, a khen chun gualsiak kidemna him him umlo inle a mang thei kit u'i. Banggual ah mang sek i hiu em ti hetchian a haksat deu ziak in, ka umna Lamka Pastor Bial in ka la mat sek dan uh tangpi chawmcha'n taklang leng ka nuam hi.

Lamka Pastor Bial hin Naupang Sunday School Khawmpi hi 2008 kum ah khan, Hill-town Kochuam zintunna in ka la mang pan ua, Sunday School Naupang pawl zosia – Beginner apat Senior tiang in a lawm in ka la mangkhawm ziang uh a hi. Gualsiak kidemna chi chuam chuam – Department tin apat mimal kidemna, Department te a pawl ah kidemna leh Naupang Sunday School pumpi kidemna ti te in a kikhen ah. Department tin ah kipat in, gualsiak kidemna chi khat ah

mi pakhat bep pan phal a hi sek ah, tichun, Kiginni nitak chu report ngaithâkna leh Sunday School pumpi ah Lengkhawp Kidemna in hun a kimang pan ah, Pathianni zingkal leh sîn nung kikhawpna te tiang in kidemna chi chuam chuam sunzawm in, Pathianni nitak chu Bialtu Pastor ahiloleh, Bial Khawmpi Chairman ahem Pathian Thugentu ding ah guat in, Gualsiak Kidemna Lawmman te hawpdawna hun in a kimang sek hi.

Ziagual ah Naupangte kitaisiakna ding chi chuam

chuam guanggal a hi ah hin, naupangte hi a thanuam thei ma ma ziang ua, a Bible chang gen ding uh leh a La sak dingte'u hi nasa takin a kizil ua, Zilsaktute'n le nasa tak in a la zilsak sek ziak un, a hiatna'u hi a det ah, a ki-atpi um ma ma sek hi. Chuleh, Sunday School Zillai hi chetlo, a hiat ding ua pha – Kochuam Thuginte, Biakna Lâ te kihilna lemchang a hia, a phachuam ma ma sek hi. Lawmman lam ah chun thil man tam talua guanggal a hi ngai pua'i. Naupangte'n a limpi ding kham tiang uh ngaitua a pha pen hi.

Programme te hi Bial Sunday School Committee in a guanggal ah, Bial Khawmpi Vaihawmna ah pawlut in, Bial Khawmpi'n a pawmpi zet zaw phatleh Bial Sunday School Committee in a sep pitinna dingin ma a la sek hi. Zia chungchang ah hin Bial Sunday School Committee hi a pawimaw ma ma ziang ah, mi khenkhat vang chun "Bial Naupang Sunday School Committee" ti in a gen hial sek uh a hi. Ahinlah, Bial Sunday

School Committee a hia, Secretary te leh Committee member te chule Bial Khawmpi Nomination Committee in a guat, Bial Khawmpi'n a pawm zet te ngen a hiu. Thumal mat dan ahin chitthei a pawimaw ma ma ziang ah, mi khenkhat chun Sunday School Union Khawmpi te bang a ti sek ua, zia chule a diklo a hi. Sunday School Union i ti phatleh Sunday School pumpi i.e. Beginner apat Piting Pawl tiang huap a hi ti hi det tak ah i hiat uh a ngâi hi. Naupang lam bik genna ding in Naupang Sunday School ti ziang sek ding a hi. Sap pau thumal khat ahem i va pansak leh Naupangte kâwk ziang gual ah ngai ding hilo a hi.

Naupang Sunday School Khawmpi mang kha nailo Bial le i um maithei ah, mang thei ding ah Bial Standing Committee in pan a lâk ah, Bial Khawmpi'n thupukna siam a pawimaw takzet hi. Tulai ah hin Synod Calendar dungzui in Naupang Sunday School Khawmpi hi nivei mat a kisua sek ah; zia hi Senior

Hin̄na Vâk

Department te'n a chuam ah Khawmpi a mat theina ding ua guanggal a hi. A ziak chu Senior Department naupangte hi khangdawng cha hi ziang leule, khanglai, nungak tangval ding hung hi ta a hi ziak un Beginner leh Primary zillai naupang neucha cha te tawh hun mangkhawm ding ah chun a lemchang chet tapua, naupang etkawl̄na lam ah zil mite gen gual in MSSU chun Senior Department te hi a chuam ah Khawmpi neipi sek a hi theina dingun guanggalna a hung siam ta a hi. Sacrament Department te hi a kigendawk

kha ngai talaw pua, a ziak chu amau hi Senior hi chet lo maleu a piting tho tau ah, ziaziakah chun, Bial Sunday School Committee in lemchang a sak dan dungzui in Senior Khawmpi ah Senior te lak ah pang ding a h'em, ahiloleh Naupang Sunday School Khawmpi ah Intermediate te zawm ding a h'em in a dinmun dingu hih a guanggal piak sek uh a hi. Naupang tamna Kochuam leh Bialte ah chun vang Sacrament Department ti in, Naupang Sunday School Khawmpi ah pan sak ziang thei a h̄iu.

I thil dawi leh ngainat tamtak te hi a mantam thei ma ma ziang ah, a diktak in thil ei kipaksak leh lungkimna te hi a thawn ngen ah mu thei vek a hi: Hepina, nuina mel kingaitawmna.

Kraws kiput ah Jesu nung zui hi talo in, Kraws lim awk in mipi i zui zaw tau a hi.

BELSEKPA

Nupan khat hi van zawk na In hawi tak khat ahin a chia sek ua. A pani un thil luigun leh leibel chi a diak in thingpi no a dawu ua. A kichen uh kum 25 champhaphak ni ahi. Zia van zawkna In hawi tak achun no melpha tak mai a mu'h a. "Zia saw ka vel thei diam uh? Zia gual ah hawi saw ka mu kha puau ah," a tiu a.

A ngaktu nu chun a vak piak phat in, thakhat lo in zia no chu ahung pau a. 'La hiatthiam lo zia a hi,' atia. "Masang ah chun thingpi no hi ala hilo kahi, tungman san mai kala hia, Ka pu hin ei la'n, ei zial in ei tat lumlet ah. 'Ei kawi thimtham in,' ti'n ka kikodawk ah, a nui kawm in 'a hun nai deu puai' a tia.

"Tichun a lum kipei thei chung khat in ei kawi a, thakhat lo in ka kipei kual vel a. hun sak in! ka lu a hai hi! Ti'n ka kiko ah. Ka pupa chun a lu ei pei khum in, 'ahun nai puai' a ti kit ngen ah.

"Tichun thukkhuk sung in ei kawi a. zia tawbang a sa chu kala thawk khak lo ahi. A bang ding ah ei hal guat ahi em ka hiapuui, ei la dawk in tia ka kiko vang in, a lu pei in, 'ahun nai puai' ti a hi kit ngen hi.

"A tawp in ei la dawk a, khang chung in ei kawi a, a vawt hiai hiai ah. A nuam deu ta hi ka vak tia. Tichun ei nawt zawl ah rawng ka pum in ei nu a, a hu chu thawk hak ka sa ma ma ka pau maw hial ah. 'hunsak in, hunsak in' tin ka kap ah. A lu pei in a hun naipuui a ti zel a.

Thakhat lo in thukkhuk achun ei kawilut kit a, a masa gual hi talo in. a leni ah sa zaw sung in ei kawi ah, hatheilo ding ka hi ti ka kihia. Kiko in, thum in ka kap ah, himaleh a ngai ngai gual in a lu pei in ahun nai deu puai ati kit hi.

Tichun kinepna um talo in, thuk zo talo in chawlsan di ka lung in aum ta. Zia laitak chun ka pu chun ei la dawk ah, khang chun in ei kawi a.

Hin̄na Vâk

Dakkal khat zaw in limet ei pia, ‘ki en in’ ei tia. Ka vak ki et leh kei kha ka bang tapua, ‘a hawi na lawm lawm e, zia hi kei hithei puang ka, ka hawi taluai,’ ti’n ka kipak ma ma hi.

“zia hi la hiat zing ding ka nuam hi’ atia, ‘zial lumlet, ta lumlet ah um hi thil bailam ahi puai, la um um in hun umsak hi leng keugawp di lahi.

Thil lum chung ah kipei vel chu luhai aum ma hi, zia kha bawl lo hileng, a mal mal a nawn/tel ding lahi.

Thukkhuk ah kikawi chu a sat ding leh a thawk hak ding

dan le ka hiai, kawi lo leng kh-ikek ding la hi.

Ka nawt lai ah akhu leh rawng ka nu lai ah a hu haw kha a nawplo leh haksak dan ka hiai, bawl lo leng tak thei puan la tin, la hinkhua zemhaw- wi di umlo di a hi.

A nivei na ding ah thukkhuk ah khan kawi lut kit lo hileng, hunsawt khawsa theilo in to lo ding la hi.

Tuhin chu zawthian la hi ta, ka siamtil ah ka lung ah um gual chet kha la hi tai.”

II Corinthians 5:17

~ Author Unknown

I hun hawi, I hun manpha, I hun lim um te haw, computer, lap- top, mobile phone leh kawi theina chi chuam chuam in i kawi sek ah, himaleh I hun phalo, kisik um hinkhua hun matdan leh a phalo him him hi I thuak in kawi he sek ah. I kawina mun te hi thengtua le hin bang a ti zaw diam?

LUNG BAWM

Mi pakhat hin lam a zawt zing lai in lung bawm pakhat tawi lek lek khat amu, a etchian leh a mawng ah hawm neuca achun thil pakhat hung pawt ding kisa awl awl ah hung phu det det amu, bang ahung ti diam ti zing kawm in zia thil chu a en zing ah, lungbawm sung ah ganhing um chun hung phu hawm vang vang in himaleh a chawl zel sek ah. A etchian ahi leh pengpelep hung suak di kisa haksa tak ah pawtdaw ding sual chu amu ta.

Chawmkhat chu a en zing nalai ah, zia pengpelep kitawm tawm pen chu a chawl phat in, ahung pawt zolo hin a ti in thil hiam khat in lung bawm chu a sukek a. Zia phat chun pengpelep chu nawp tak in ahung pawt thei ta, ahinla pian bukimlo in, a tha chu a khang ding tit nailo in chuleh a pum chu lianpi in ahung pawt ah leng zolo in tual in a kiatha ta, sawt dam zolo in a thi pai ngal ta a hi.

Pengpelep hi Pathian in a siam dan achun, ama thahatna ngei a ahung kitawm ah a hung piandaw na ding lampi hung kisiam ah a kizet leh a kisang khan a taksa pum ah tui um te kha a tha lam ah chia in tichun zia a kitawm na tha khan a tha(wings) kha a khantit sak a hi. Tichun zalen tak in a lengdawk thei sek bep a hi. zia chu hialo in mipa khan a va sukek ah a khan tit zolo sak khawlaw ta a hi.

Hinkhua ahin haksatna i tuak zosia hi ikim ikiang ah mi panpi pawimaw ah, panpina dawn zia ah haksatna taikhel ding ihi zing puai, haksatna i tuak te hi Pathian in ei a ding ah zillai leh hinkhua nuamzaw i mat theina ding ah ei siam piak zia in aum thei hi ti hiat hi a pawimaw hi. Haksatna la tuak ngai em? Mite panpi la ngaicha sek em? Lung bawm chanchin apat hin zil ding aum thei diam?



SUNNA

Upa Palal Thangluai (1936 – 2021)



Upa Palal Thangluai hi Phaikhotang, Jiribam in March 1, 1936 ah khan a piang ah. Ama hi Pu Mangkai leh Pi Dimhat te chapa panina a hi. 1961 kum in Pi Chawngkhonieng tawh a kicheng ua, chapa 2 leh numei 1 a nei u'i.

Kum 1950, February ni 12 in Baptisma, Hill-town RCG Kochuam in a la chang ah, 1986 kum in, Leilon Biak In ah Rev. Soikhothang khut in Upa Ordination a la chang hi. Ama hi RCG leh Full Gospel Kochuam in a la um ah, 2001 kum ah Mizoram Synod zawp a hi ah kipat khan Lamka Kochuam ah lawi in, ginum takin Kochuam Upa na a sem ah; Tualsung Kochuam, Bial leh Presbytery te ah mawpuakna leh chanvo chuam chuam te tûk in, tawmngâi leh gunchu takin a la sem sek hi.

Vangsiat um tak in a zi, Pi Chongkhonieng, hun sawt tak damlo zing chun October 18, 2021 zingkâl ah khan a beisan ta. A zing, October 19, 2021 nitak in ama Upa Palal Thangluai in ei beisan kit ngâl ah, Kochuamte a kithawmhau ma ma hi. A damlona hi *CVA (Cerebral Vascular Accident) due to thrombosis* ti a hia, hun bangchan a h'em tak chu a chenna In, Red Cross Road ah ki-enkawl a hi.

Nasepna lam ah chun ama hi Medical Department ah, 1965 kum apat LDC in a la sem pan ah, zia ah kipat chu UDC, Head Clerk te ah kaisang to zel in, kum 2002 ah khan Assistant Director in a la pension ta a hi.

October 20, 2021 ah Upa Palal Thangluai Vuiliamna hun chu a chenna In ah, Bialtu Pastor, Pastor K. Jama Vaiphei in a mat zaw in, Lamka Kochuam Biak In ah, Lamka North Presbytery Moderator, Upa Thualkhawlian in thâkdawna hun a mang bawk ah, tichun, New Christian Cemetery ah Bialtu Pastor in a vuiliamna ta a hi.

Chanchin ziaktu:

*Upa Lunkhokai
Secretary
Lamka Kochuam*

Khawvel tawh i kibang taluau ah khawvel in ei hua theilo a hi.

jNo hawm apat in bangma a sundaw thei puai, Nang kha ki sung dim masa phawt in.

Lawng haw khu a kiang leh kimvel ua tui um ziak akhun a tum ziang puau ah, a Sung ah tui a lut sak phat chauh leh a tum pan sek a hi.